

APUKARÍPSIS

Jesukrístu Juánkan paant iniaktusma

Jesukristu paant awajsamu

1 ¹Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni santarin akupak ashí winia paant awajtursamai. Wisha Juánkaitjai. ²Yus timia nunasha tura Jesukrístu ujakamia nunasha tura wi ísmaj nunasha ti paant aya nekasa nuna tájai. Penké wáitratsjai.
³Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakani siati naka pujurainia nusha shiir yainmakarti. ⁵Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji.
⁶Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.
⁷Wats, Krístuka yuranmijjai winittiwai. Tura íjuarmia nusha tura ashí shuarsha nuna wáinkiertatui. Túrawar ashí sapijmiainiak úutiartatui. Maa, nekas nunis átatui.
⁸Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai

ti kakaram Uunt Kristu. Tuke yaunchu pujuyayi. Núnisan_n yamaisha pujawai. Tura nuke ataksha winittiwai.

Kristu ti shiir wincha ajasun Juan_n wainkiamiania nu

⁹Wi Juan_n atumjai_n métek waitia asan atumí yachintjai. Núnisan_n nayaimpiniam, Yus akupeana nu_n, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nun_nkanam sepunam apujsamua núnisan_n pujumjai. ¹⁰Tumai tumin_n tsawantai_n Yusa Wakani_n pujurtakui winia úkuruin_n kakantar untsunman antukmajai. Kachu umpúamua núnis ti kakarmauyayi.

¹¹Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmaya_n Y rétranam ashí retra áintsaitjai, tímiai. Tuma asantai wáinmena ju_n, papinium áaram Asia nun_nkanam siati péprunam Yus-shuar írunna nu_n akuptukarta. Ju_n peprunam akupkarta: Ipiusia, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

¹²Túrutkui yaki túruta tusan apajasan fíkman siati shirikip ikiutain kurijiai_n najanamun wainkiamjai. ¹³Tura nu_n ajapén Aents Ajasua núninan wajan wáinkiamjai. Tura pushirísha nawea timiai nuntuaru entsaruyi. Emenmamkesha kúriniak netsepnum emenmamauyi. ¹⁴Tura ni muuke intiashísha murikiu uré nijiamua núnisan_n tura micha núnisan_n ti puju chárayi. Tura ni jiisha jiya núniskeyi. ¹⁵Ni nawesha ti wincha asa jiru yan_nkutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. ¹⁶Ni untsuurin_n siati yaan takakuyi. Tura ni weneniasha puniá áinis tsakatskat mai ere awajsamu jínmiiai. Ni yapísha etsa ti etsantuk íischamnia núnisauyi.

¹⁷Nuna wáinkian jaka áintsanak naween iniaarmajai. Túrasha ni untsuurí uwejen awa_ntrus turutmiai, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. ¹⁸Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirín takakkun nérenniuitjai, timiai. ¹⁹Tuma asantai wáinkiamna jusha, yamá wáinmena nusha, tura ukunam átatna nusha aartá, timiai. ²⁰Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuurin_n siati yaa wainkiam nu, siati péprunmaya_n Yus-shuaran wáinniun nakumenawai, turutmiai.

Ipisiunam chícham áatramu

2 ¹Nuyá turutmiai ‘Ipisiunmaya_n Yus-shuaran wáinin ju_n áatratá: Siati yaan untsurnum takakna nu tura núnisan_n siati shirikip-ikiutai kúrinman ajapén atenta wekáa nu, tawai: ²“Ashí ame túram nuna

nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. ³Ti wáitiatmek katsuntram yawetsuk Winia ti takartusuitme. ⁴Túrin áminin juna títiatjame. Yus aneakum yámankamtaik ti penker wekainiuyam núnisam túratsme. ⁵Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame. ⁶Tura ju péñker túriniatme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wissha núnisak nakitijai. ⁷Kuíshtinia nu shuar Yusa Wakani ashí Yus-shuaran timian antukti: Nupetmakunka tuke iwiaaku pujutai numi neren yúatniun tsañkatkattajai. Nu numi Yus pujana nuj wajaawai.” Tu áartá’ turutmiai.

Ismirnanam chícham áatramu

⁸Nuyá turutmiai ‘Ismirnanmaya Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisan jaka nantakmia nu, tawai: ⁹“Ashí ame túram nuna nékajai. Ti wáitiam nunasha tura kufrinchaitmena nunasha nékajai. Antsu Yusañkia ti kufrinniuitme. Tura shuar uunt iwianch Satanása shuari áiniayat “Israer-shuaraitjai” tuñiak yajauch áujmatramena nuna nékajai. ¹⁰Ti wáitsattamna nu ashamkaip. Íwianch ashí nekapramsataj tusa atumiñian sepunam enkeattawai. Nuñ tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. ¹¹Kuíshtinia nu shuar Yusa Wakani ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

Pírkamunam chícham áatramu

¹²Nuyá turutmiai ‘Pírkamunmaya Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³“Ashí ame túram nuna nékajai. Uunt iwianch Satanás akupea nuñ pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai. ¹⁴Túrin áminin juna títiatjame. Atumiñia shuar yaunchu Yúsnan etserin Param yajauch jintiamun tuke emetainiawai. Niisha Israer-shuaran tunáa awajsat tusa kapitían Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisan ti tsanirmatniun jintintiamiayi. ¹⁵Atumiñia shuarsha Nikiurás jintiamuncha, Wi nakitijai nuna, iniaisatniun nakitainiawai. ¹⁶Wats, enentáimpram iniaisata. Túrachakminkia Wi wari winin winia wenuruia puniá jiinia nuñai máaniaktajai. ¹⁷Kuíshtinia nu shuar Yusa Wakani ashí Yus-shuaran

timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarí aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

Tiatiranam chícham áatramu

18Nuyá turutmiai ‘Tiatiranmayá Yus-shuaran wáinin ju áatratá: Yusa Uchirí jii jijiai métek keena nu tura núnisan nawe jiru yankutaku jiamua núnis néwar ajawa nu, tawai: 19“Ashí ame túram nuna nékajai. Yus shiir enentáimtakum aneam nuna nékajai. Tura katsuntram péñker takaamna nuna nékajai. Yáunchujai nankaamas péñker túrame yamaikia. 20Túrin áminin juna títiatjame. Nu nuwá Jesapír awematsme. “Yúsnan unuiniajai” tinia Wíi shuaran ti anañkenawai. Tura ti tsanirmatniuncha tura ántar-yus-sutai namañken maar yúatniun jintintiainiawai. 21Niisha ni tunaarín enentáimiar iniaisat tusan nákasuitjai. Tura nakitiawai. 22Wátsek, sunkurmatkiakan peaknum áepsattajai. Tura chíkichcha nijiai tsanirma ainia nunasha nijiai métek ti wáitkiastatjai. Ni tunaarín enentáimiar iniaisacharmataiñkia túrattajai. 23Ni uchirincha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme. 24Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtatjarme. 25Tura Wi jeatsain takakrum nu emetatarum. 26Nupetmakunka Wi wakeraj nunak tuke initsuk túrana nuna untsurí nunkanam akupkatniun tsañkatkattajai. 27Winia Apar tsañkatrukmiá núnisnak akupkatniun tsañkatkattajai. Tura nuwe najanamu jirujai awati ijiakratniua áinis ti kakarmajai akupkattawai. 28Yáñkuam káshik jiinia nuna susattajai. 29Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

Sártisnum chícham áatramu

3 1Nuyá turutmiai ‘Sártisnumiá Yus-shuaran wáinin ju áatratá: Siatí Yusa Wakanin takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wíjiañkia jákaitme. 2Shintiarta. Kajinia nu umpuím ekeemakta. Kame Yusjai íisam péñker túrichuitme. 3Yus-Chicham ti shiir enentáijiai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumñiñkia kasa núnisnak nékatsmin jeartiatjame. 4Tura Sártisnum shuar ishichik pushirí wapik máacharu pujuiniawai. Nusha ti péñker áiniak pushí pújun entsarar Wíjiai wekasartatui. 5Nupetmakuka pushí pújun entsartatui. Tura iwiaaku átinia nu papiniumiá ni naarí áarman japirashtatjai. Antsu winia

Apar tura ashí nayaimpinmaya suntar íimmianum shiir áujmattsattajai. ⁶Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawiri takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Ju na tawai: ⁸“Ashí ame túram nuna nékajai. Kakarmachuitatmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chíkich penké epenchamniaiti. ⁹Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuarán, nekas ámin aneajna nuna nekaawarat tusan amíini tikishmatkiarartajai. ¹⁰Katsunrata tímiaj nu, shiir umirka asakmin Wisha ti wáitsatin ashí nunkanam áatna nuyá uwemtikrattajme. Nu wáitsatniujai ashí nunkanmaya shuar nekapnasartatui. ¹¹Wárik winittijai. Takakmena nu emetata. Akinkiatniuitmena nuna chíkich shuar atantramkiarajin. ¹²Nupetmakunka winia Yusru jee tankirin awajsattajai. Tura nuyá penké jíinkichartatui. Tura nin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamaram Jerusarénga Yúsnumia tára núiti. Núnisan winia yamaram náarun nin áatrattajai. ¹³Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴Nuyá turutmiai ‘Rautiséanamaya Yus-shuaran wáinin ju áatratá: Wáitruitsuk nekasa nunak tiniua nu tura núnisan ashí Yus najanamun Úuntriya nu, tawai: ¹⁵“Ashí ame túram nuna nékajai. Tura michaash míchachuitme. Núnisan tsuersha tsuerchaitme. Míchaitkiumsha tura tsueraitkiumsha maak. ¹⁶Kame míchachu tsuercha antsu aya tsuetsuetak asakmin imiutkattajme. ¹⁷Iis, “Kuítrinniuitjai, ti irumpraitjai, warinkisha atsumatsjai” tame. Túrashashí yajauch, wáitnenmai, kuítrincha, kusuru, tura misú iyajme. ¹⁸Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pénker ímprataj tusam jíinium enketai enkeeta. ¹⁹Aneajna nuna chichareajai. Nu asamtai kakaram ajasam tunaarum enentáimpram iniaisata. ²⁰Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan amíijai yurumáttajai. Tura amesha Wijiai yurumáttame. ²¹Nupetmakuka akupin pujutainium Wijiai pujustatui. Wisha núnisnak nupetmaku asan winia Aparjai akupin pujutainium

pujusuitjai. ²²Kuíshtinia nu shuar Yusa Wakaní ashí Yus-shuaran timian antukti.” Tu áartá,” turutmiai.

Nayaimpiniam Yúsan shiir awajenawai

4 ¹Nu nankaasmatai nayaimpiniam waiti uranniun wainkiamjai. Tura nuyá kakaram unsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktustajame” turutmiai.

²Nu chichamaik Yusa Wakaní akantukmiai. Túrutamtai nayaimpiniam akupin pujutainium pujan wainkiamjai. ³Niisha jaspi kayasha tura kurnarínia kayasha nujai métek ti wínchayui. Akupin pujutain tuntiak téntakuyi. Nusha ismirarta kayajai métekeyi. ⁴Chíkich paintikuaru (24) akupin pujutain nu pujutain téntakarun wainkiamjai. Tura paintikuaru uunt púju entsarainian tura kurin etsenkrakainian, nuí pujuinian wainkiamjai. ⁵Akuptainiumiã peemsha ipiamtasha unsummasha jíniarmai. Tura nu pujutainium naka siati shirikip kearmai. Nusha siati Yusa Wakanínti. ⁶Núnisañ nu pujutainium naka nayaantsa áanin ti saar amai.

Nu pujutainium wakenmaanísha niisháa tañku kuaru téntakar ármiai. Ukurínísha tura eemsha jíi irunmiai. ⁷Emka tañku úunt yawaa áanniyui. Chíkichka turu uchichia áanniyui. Tura chikichcha shuara yapia áanniyui. Tura chíkichka churuwia nanamua áanniyui. ⁸Nusha sais nanamtin ármiai. Tura jíisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisañ yamaisha pujawai. Tura ataksha juke winittiwai” tiniu armai.

⁹Tura uunt pujutainium pujana nu tuke iwiaaku pujú asamtai nu tanku ti shiir awajsar yúmiñkiak pujuriarmai. ¹⁰Túruiniakui paintikuaru uunt tuke iwiaaku pujun tikishmatainiak ni etsenkrutairin naka áepruiniak tuiniawai:

¹¹“Úuntá, ii Yúsriñme. Tuke shiir awajmainme. Ashí nankaamas kakarmaitme. Amek ashí írunna nu najanaitme. Tura aya wakerakum najanamame. Ame wakerakmin irunainiwai” tuiniawai.

Murikkia papin urakminiaiti

5 ¹Nuyá akupin pujutainium pujuya nuna untsuurín papí penuarma áanniun wainkiamjai. Nu papisha initiaanísha tura pátatkesha áarmauyi. Tura urakchamnia atí tusa siati anujtukmajai kaki peekmauyi. ²Tura nayaimpinmayã suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun

jaak urakminiait?” ³Tura nayaimpinmayasha nunkanmayasha tura jakamunmayasha chikichkisha nu papin urakmin atsumiayi. Áujtsuk íistinniasha tujinkiarmai. Tímianu akupin atsumai. ⁴Nu papin uraktincha tura áujtsatniusha, kame íistincha atsakui ti úutmiajai. ⁵Nuyá chikichik uunt turutmiai “Ti úútíp. Israer-shuarnumiá Úunt-yawa, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶Nuyá uunt pujutaiya nuí tura kuaru tan kunam ajapén tura úuntnum ajapén Murik wajan wainkiamjai. Maamua áintsan ketiat iwiaakuyi. Kachurisha siátiyi. Ni jiiisha siátiyi. Nusha Yusa Wakani siati ashí nunkanam akupramua nuuyi. ⁷Nu Murik we nekas uunt Akupniun untsuurínian nu papin achikmiayi. ⁸Tura papin achikmatai kuaru tan kusha tura paintikuatru uunt arma nusha Murikiun tikishmatrarmiayi. Ashí uunt arpa tuntuitiain takaku armai. Tura ashí kun kuin en ketain kuri najanamun takaku armai. Nu kun kuin Yus-shuar áujsamuiti. ⁹Ju yamaram kantancha kantampriarmai:

“Amek imiá nan kaamas akupniuitme. Amek papí achikiam anujtukmari jáakminiaitme. Yus-sutai naman kea áinis mantamna asam túramniaitme. Ashí nunkanmaya shuarnumiasha Yusna árat tusam ame numpemjai in sumakmiame.

¹⁰Turam akupin awajkartusuitme tura núnisan ii Yúsriniun pujurin awajkartusuitme. Tuma asakmin akupin ajarar ju nunkanam akupkattaji.” Tu kantamainiawai.

¹¹Tura untsurí nayaimpinmaya suntar uunt pujutaincha tan kuncha tura úuntnasha en kekawarun wainkiamjai. Nusha nekapmarchamnia ti untsurí armia nu ¹²kakantar tiarmai:

“Murik mantamnamia nu akupin ajar ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

¹³Núnisan ashí Yus najanamu, nayaimpiniam írunna nusha, nunkanam írunna nusha, nunká inít írunna nusha, nayaantsanam írunna nusha, tuñnian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴Tura kuaru tan kusha “Tuke núnisan atí” tiarmai. Tura paintikuatru uuntka nekas tuke iwiaaku pujá nuna tikishmatar shiir awajsarmai.

Murikkia siati anujtukman jaakmai

6 ¹Wi iyakui Murikkia chikichík anujtukman jaakmai. Túramtai chikichík tan ku ipiamtajai métek kakantar untsurun antukmajai. “Winim iitiá” turutmiai. ²Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jfinkimiai.

³Nuyá Murik anujtukma jímiaran jáakmatai taṅku jímiara nu “Winim iitiá” turutmiai. ⁴Túrutkui chíkich kawai kapaakun wainkiamjai. Nui ekeemia nuna puniá úuntan susamuyi. Nusha shiir pujuscharat tusa ashí jú nuṅkanmaya shuaran máanaimtikiatniun akupkamuyi.

⁵Nuyá Murik anujtukma menaintiun jáakmatai taṅku menaintiua nu “Winim íitiá” turutmiai. Túrutkui kaway mukusan wainkiamjai. Nui ekeemia nusha kijin nekapmatain takakuyi. ⁶Tura kuaru taṅku ajapénia chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisan machasha nijiamchisha amuukacharat tusam penker wáinkiaata.” Tu timiai.

⁷Nuyá Murik anujtukma kuátrun jáakmatai taṅku kuarua nu “Winim iitiá” turutmiai. ⁸Túrutkui kaway yaṅkun wainkiamjai. Nui ekeemia nusha Jákatín náartiniuyi. Tura nuna úkurin Jatai nemark winimiai. Nusha ashí nuṅkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajajisha suṅkurjajisha tura yajasmajai máawarmai.

⁹Nuyá Murik anujtukma sénkun jáakmatai Yus-sutai kuṅkuin ekemtai wakenmaani íismajai. Túran Yus-Chichaman etserainiakui máawarma wakanin wainkiamjai.

¹⁰Nusha kakantar untsumainiak tiarmai “Uuntá, ti penker asam támena nu umiátsmek. ¿Urutiak nuṅká pujuinia nú shuar ii mantamnamunam yapajmiátruktam?” tiarmai.

¹¹Tuúniakui pushí pújun susar tiarmai “Chikichcha Krístunun etserainiakui mantamnatin ániawai. Nu náakrum ishichik ayampratarum” tiarmai.

¹²Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsan mukusa ajasmai. Kashí-nantusha numpá áintsan ajasmai. ¹³Tura yaasha wampú nere nase umpuim ti majuwa áintsan kákekarmai. ¹⁴Nayaimpisha papí penuara júamua áintsan menkakamai. Tura naintcha yajá apujnasarmai. Tura nuṅkasha nayaantsanam ajapén atentrainia nusha yajá apujnasarmai. ¹⁵Tura jú nuṅkanam akupin ainia nusha náinnium wear kayá wáanam uumkarmai. Nijijajisha ashí shuar, uuntcha, kuítriniusha, suntara kapitíantrisha, ashí kakaram ainia nusha, tura takarniusha ankant ainia nujai náinnium wearmai. ¹⁶⁻¹⁷Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

Israer-shuarnumiá anujturma armia nu

7 ¹Nu nankaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase

kukarsha, nayaantsanmasha tura kampunniunmasha nasenkacharat tusar wajatiarmai. ²Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaania winian wainkiamjai. Tuke iwiaaku Yusa anujtutairin takakauyi. Nusha kuaru suntran kakantar untsuak tímiai, ³“Ti Yusrí takarín ainia nu nijiaínium árar anujtatsrinín kukarsha, nayaantsasha, tura kampunniusha nasejai yajauch awajsairap” timiai.

⁴Tura tímiajní untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik siantu kuarenta kuaru mir (144.000) armai. ⁵Jutá weanmayá tuse mir (12.000) anujtukma armai. Rupín weanmayasha tuse mir anujtukma armai. Kat weanmayasha tuse mir anujtukma armai. ⁶Aser weanmayasha tuse mir anujtukma armai. Niptarí weanmayasha tuse mir anujtukma armai. Manasés weanmayasha tuse mir anujtukma armai. ⁷Semeun weanmayasha tuse mir anujtukma armai. Riwí weanmayasha tuse mir anujtukma armai. Ísakar weanmayasha tuse mir anujtukma armai. ⁸Sapurún weanmayasha tuse mir anujtukma armai. Jusé weanmayasha tuse mir anujtukma armai. Pinjamín weanmayasha tuse mir anujtukma armai.

Ti untsurí shuar pújun entsararu

⁹Nuyá ti untsurí shuaran wainkiamjai. Ashí nunkanmayá nusháa shuaraim iruntrarú ásar nekapmarchamnia armai. Tura nusha uunt akupin pujutainium tura Muriknium naka wajaarmai. Tintiuki nukéa áaniun takaku armai. Tura ashí pújun entsaru armai. ¹⁰Ashí kakantar unsumainiak tiarmai:

“Ti Yusrí uunt akupin pujutainium eketna au tura Muriksha imia Niñki Uwemtikin ániawai” tiarmai.

¹¹Tura nayaimpinmayá suntarsha uunt akupin pujutaincha, kuaru tanuncha, tura úuntnasha téntatkar armia nu piniakum nunká tepersar Yúsán shiir awajsar ¹²tiarmai

“Nekasaiti. Tuke iniaitsuk ii Yusrí ti shiir awajsatniuiti. Niñki ti neka, ti kakaram, ti akupin, tura ti penker asamtai tuke yuminsatniuiti. Núnisan atí.”

¹³Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴Túrutkui “Uuntá, amek nékame” tímiajai.

Tutai nii túrutmiai “Jú shuar ti waitsaru ániawai. Túrawar Murikiu numpéjai ni pushirí nijiamawar puju awajsaru ániawai. ¹⁵Nuna túrawaru ásar yamaikia Yusai naka pujusar tsawajsha káshisha Yúsán ni Jeen takainiawai. Tura akupin pujutainium eketna au tuke wainkiartatui. ¹⁶Yamaikia tsukajajsha kitiakajajsha wáitsachartatui. Tura etsasha sukuiniak yajauch awajsachartatui. ¹⁷Murik, akupin pujutainium naka

wajana au, ni murikrin wáiniuk áyureak ti penker púkuni entsa waana nuí apuj Sartatui. Tura Yus ni neajkincha ukuitiurartatui.” Tu túrutmiai.

Anujtukma siatia nu jaakma tura kunquin ekeemataijjai túrunamu

8 ¹Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ²Nuyá siati suntar Yusai naka wajainia nuna wainkiamjai. Nusha siati kachun susamu armai. ³Nuyá chikichik suntar kunquin enketain kurijjai najanamun itiamai. Tura Yus-sútainium ayamas wajasmatai núkap kunquin sunasmai. Nu kunquin ashí Yus-shuar áuj samujai métek kunquin ekeematainiam ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. ⁴Tura suntar ekeemakmatai kunquinia mukuintiuri Yus-shuar áuj samujai métek Yúsan amainkiamai. ⁵Nuyá nu kunquin enketain suntar achik ekeematainmaya ji kapaan káirin áimiak ju nunkanam ukaamai. Túramtai ipiamtasha unsummasha, peemsha, tura uusha armai.

Kachu umpuarma

⁶Nuyá siati suntar kachun takakainia nu umpuartaí tusar iwiarnararmai.

⁷Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí írunka nuí ekeemakmai. Tura ashí nunkanam chírichrin takamtsuk ekeemakmai.

⁸Nuyá suntar jímiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹Núnisan menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

¹⁰Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkuninmasha menaint nakakam jeeánum kákekamai. ¹¹Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai.

¹²Nuyá suntar kuatrua nu kachun umpuarmatai menaintiu nakakam jeeá tsawaf-nantusha kashí-nantusha tura yaasha emesnarar ajapén tee ajasarmai. Túrunawar tsawai sha káshisha menaintiu nakakam jeeánum tsáapnircharmai.

¹³Nuyá chikichik suntar nayaimpiniam nanamun wainkiamjai. Nusha kakantar unsumuk timiai “Maa, chikichik menaintiu suntar umpuiniakui nunkanam pujuinia nu ti wáitsartatui.” Tu timiai.

9 ¹Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan

tunáa shuar jákaru matsantai yawirín susamuyi. ²Tura uraimtai nu nánkatkachu wáanmaya ti mukuint jiiñmiai uunt jiniumiá áintsan. Tura etsancha tee awajsamai, yuranmincha tee awajsamai. ³Nuyá nu mukuintiumaya manchi jíntrar nunká ti yujaarmai. Tura ju nunkanmaya titínkia áinis najamin ajastinian susamu armai. ⁴Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijiañium Yusa naarí áarar anujtukchamunak yajauch awajsatin armai. ⁵Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai. ⁶Nuj shuar wari jakataj tuñniayatan jákachartatui. Ti wakeruiniayatan jákatniun tujinkiartatui.

⁷Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapísha shuarna áinis armai. ⁸Intiashísha nuwánua núnis armai. Naiísha úunt yawá naiya núnis armai. ⁹Netsepén namaka saepea áinis jiru péeramu armai. Tura nanamenaksha kaway karu japiiniak mesetnum tsékeena núnisan téter ajarmai. ¹⁰Ujukésha titínki ujukea áinis asa janí ajakin armai. Nujai tuke senku nantu yujarsar shuaran íjuar wáitkiastin armai. ¹¹Ni uuntrísha nánkatkachu wáa uraimia nuyaiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

¹²Jujai emka wáitsatin nankaamasai. Túrasha tuke jímiar taasai.

¹³Nuyá suntar saisa nu kachun umpuarmatai chichaman antukmajai. Yusai naka kunkuin ekeemaka Yus-sutai kurimpramu amai. Tura ni kuartru yantame kachu jiiñmiai. Tura nuyá chichaak ¹⁴suntar kachu takakun saisa nuna timiai “Kuartru suntar Eupratis kanusá pujuinia nu atiram akupkarta.” ¹⁵Túramtai nu kuartru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai. ¹⁶Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirurín antukmajai. Nusha jimiará siañtu miyun (200.000.000) armai.

¹⁷Tura ímiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku winíka tura yanjú armai. Tura kawaiísha úunt yawáa muuke áinin armai. Tura ni wenyasha jisha, mukuintiusha, asuprisha ti tsuér keá nu jíiniarmai. ¹⁸Nu menaintiu ti yajauch wáitsamujai menaintiu nakakam shuar untsurí jákarmai. Jijiaísha, mukuintiujaísha, asuprijaísha jákarmai. ¹⁹Nujai nu kaway ni wenejai shuaran wáitkiasarmai. Tura ni ujuké napí múukeya áinin áрмаi. Nújaísha shuaran wáitkiasarmai.

²⁰Tura nujaiísha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha

tikishmatratniun iniaisacharmai. Nu ántar-yus kurijjaisha, kuítjaisha, jiru yan_kutakujajisha, kayajajisha, numijajisha najanamu ásar wainmaktinniasha, antuktinniasha, tura wekasatniuncha tujintiainiawai. ²¹Núnisan man_kartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

Papichin suntar takusmia nu

10 ¹Nuyá chíkich kakaram suntar nayaimpinmaya táarun wainkiamjai. Nusha yura_kim amúámu tura múuknum tuntíak téntakmauyi. Yapisha etsajaj métek wínchauyi. Tura kujapésha ji keá áintsan_keyi. ²Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menaaríní kukar tarimias wajasmai. ³Tura úunt yawa kakar shiniak chicháa áinis ti kakaram untsumkamai. Nujaj siati (7) ipiamtasha chichasarmai. ⁴Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

⁵Tura nuyá, suntar nayaantsanmasha tura kukarsha tarimias wajama nu ni uweje untsuurín nayaimpinmaaní takuimiai. ⁶⁻⁷Tura timiai “Pe_ké ishichik ajasai. Suntar siatia nu umpúakuínkia Yus ashí yaunchu enentáimpramia nu uminkiatawai. Emka ujatsuk ukunam ni shuarín Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nun_kancha, nayaantsancha, tura ashí nuí írunna nunasha najanaiti” timiai.

⁸Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuuríní papin urak takakna nu achiktá” turutmiai. ⁹Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakemínkia yapamprattame” túrutmiai. ¹⁰Nuyá papichin suntarnumiá jukin yuamjai. Tura nii turutmia núnisan wenuruínkia ti yumin nekapramjai. Tura antsu yuan wakeruínkia yapampramjai.

¹¹Tura nuyá turutiarmai “Waketkim ataksha ashí nun_kanmaya shuaran tura ni kapitíántríncha Yus tana nu ujakartiniaitme.” Tu túrutmiai.

Jimiará shuar Yusaiya akupkamu

11 ¹Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram nama_n-maa-Yus-sutaisha nekapmartá. Tura nuí Yúsán shiir awajeena nusha nekapmartá. ²Antsu jea áarínkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaré_nkan kuarentitús (42) nantu nuí akupeenak mash yajauch awajsartatui. ³Túruiniakui Wikia Wii-shuaran jímíaran

akatran akupkattajai. Nusha chikichik mir jimiará siantu sesenta (1.260) tsawant pujusar Winian etserkartatui. Nuka menaintiu uwí nankaamasaiti. Útkur-entsatai pushin entsaru ártatui.” Tu turutiarmai.

⁴Nu jímiar shuarsha nayaimpiniam nakumkamu ániawai. Uriuiu numisha jímiar tura shirikip ekeemataisha jímiar nayaimpiniam awai. Nusha ju núnká Uuntri Yusaí wajainiak, jímiar akatramua nú shuaran nakumainiawai. ⁵Shuar nin yajauch awajsataj tutai ni weneniá jinia jíiki nemasri ashí áesatniuiti. Núnisanñ nin yajauch awajsatniun wakera nuka jákartatui. ⁶Nu aentska Yúsnan áujmatainiak yumi yutukaip títinian kakarman takakainiawai. Núnisanñ entsancha numpa awajsatniun kakarman takakainiawai. Tura ashí yajauchia nujai aentsun wáitkiastinian takakainiawai. Nuna ashí ni wakeruinia nui páchitsuk túramin ániawai. ⁷Tura ni takatrin umikiarmatai Ti Kajen Yajasma nánkatkachu waanmaya jíinia nu mesetan najata nupetak máawartatui. ⁸Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntri Jesukrístuncha máawarmiayi. Nu péprunmaya shuar tuke tunaan túrin ásarmatai Ejiptu tuíniak tura núnisanñ Sutuma tuíniak nu péprun páchiiniawai. ⁹Tura menaintiu tsawant nuyá nankaamas ashí núnkanmaya shuar jaka tepan ísar iwiarnascharti tiártatui. ¹⁰Nu jákarmatai ashí núnkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru ásarmatai ti warasarmai. ¹¹Nuyá menaintiú tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹²Nuyá nu nantakiaru nayaimpinmaya kakaram unsumman antukarmai: “Jui yakí wakatarum.” Tu unsummiai. Tutai ashí ni nemasri íimiainiain yurankim amuam nayaimpiniam wákarmai. ¹³Túmainiai ti úurkamtaí tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajsarmai.

¹⁴Jímiar wáitsatin nankaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntri Yus tura ni Anaikiamu Kristu ashí shuaran akupin ajararai. Niisha tuke amutsuk akupkartatui.”

¹⁶Nuyá paintikuatru uuntka akupin pujutainium Yusaí naka pujuarmia nu piniakum tepersar Yúsan shiir awajenak tiarmai:

¹⁷“Uunt Yusá, ti kakaram asam Ámijiai tujinkiatin atsawai.

Yáunchusha, yamaisha, tura tuke amuutsuk iwiaaku pujuwitme.

Ame ti kakarmarmijai nekas akupkatin juarme yamaikia. Tuma asakmin yuminsajme, tiarmai. ¹⁸Ashí shuar kajertamkaru aijn yamaikia amesha kajerkatin tsawant jeayi. Jákarusha iniantkim ni túramurí ísartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.”
Tu tiarmai.

¹⁹Tuñiakui Yusa Uunt Jee nayaimpiniam ana nu uranmiatai wakenmaani Chícham Aarma Chumpitai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

Nuwasha tura Ti Kajen Yajasmasha

12 ¹Nuyá nakumkamu ti enentáimpramnia nayaimpiniam wantinkiamai. Nuwá etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. ²Nu nuwá jamtin asa jurertaj tusa wátiak ti kakantar uutmiai.

³Tumai ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspan etsenkraku ármai. Tura kachurísha tíasauyi. ⁴Menaintiu nakakam jeeán yaan ni ujukéjai japiki akakermai. Tura nunká utsamai. Nu Ti Kajen Yajasma nu nuwá jatema nuí wajasmai. Júermataik yuruataj tusa wajattsamai. ⁵Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutanium Yus pujana nuí junakmiai. ⁶Tura núwaka atsamunam pisarmai. Nuí pujustinian Yus iwiarturmai. Tura chikichik mir jimiará siantu sesenta (1.260) tsawant ayurnat tusa akupkamai. Nuka menaintiu uwí nankaamasaiti.

⁷Nuyá nayaimpiniam meset amai. Nayaimpinmaya suntara kapitíantri Mikiar ni suntaríjiai Ti Kajen Yajasmajai máanaikiarmai. Ti Kajen Yajasmasha ni suntaríjiai ti máanaikiarsha ⁸nupetmakcharmai. Túramtai nayaimpinmaya jiki akupkamuyi. ⁹Núnisan Ti Kajen Yajasma ashí ni suntaríjiai nunká akupnakmai. Nu Yajasmasha iwianchi kapitíantri Satanás tutainti. Yáunchuya-napiiti niisha. Ashí nunkanmaya shuáran ananniuiti.

¹⁰Nuyá nayaimpinmaya kakaram unsumman antukmajai. Tura timiai:

“Uunt iwianch ii yachin yajauch áujmatin jiki akupkamu asamtai yamaikia ii Yusri uwemtikratniusha tura ni kakarmarin iniakmasticha tura akupkatniusha jeayi. Anaikiamu Krístusha ashí akupin ajastinch a jeayi. Tura uunt iwianch ii yachin tsawaisha káshisha iniaitsuk Yusai yajauch áujmatniua nuna ¹¹íksan ii yachi nupetmakarai. Yus-susamu murikiu numpea

áinis Jesukrístu numpejaj nupetmakarai. Niisha jákatnuiutkiusha surimiatsuk nekas-chichaman páchitsuk etserkarmai. Nujajsha uunt iwianchin nupetkarmai. ¹²Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitentajrume. Ni tsawantri ishichik ajatesman nekáa ti kajekuiti.” Tu timiai.

¹³Nuyá Ti Kajen Yajasma nunká ajapna nuwá áishmankan jurerma nuna áintraimai. ¹⁴Turakuí nuwan uunt nanapen churuwia nanapea áinis sunasmai. Nujaj nanamuk yáunchuya-napiya pizar atsamunam wemai. Tura ni ayuratniunam menaintiu uwí nuyá sais nantu pujusmai. ¹⁵Nuyá nu napi ni weneya entsá jiki nujan_krumamai nuwan ajekrataj tusa. ¹⁶Túrasha nunka nuwan yayak nakaak nu entsan mash ukuyámai. ¹⁷Túramtai nuwan ti kajerak ni weeá chíkich írunka nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakuí, nijijai máaniaktaj tawai.

Nuyá Yajasma jímiara nu

13 ¹Nuyá nayaantsa káanmatkariin wajasan nayaantsanmaya Yajasma jiniun wainkiamjai. Muukésha siátitiat kachuri tias tura akuptai tawaspasha tias armai. Ashí muuken Yúsan yajauch chicharin tu áarmauyi. ²Nui wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Wenésha nekas kajen yawáa áinniuyi. Tura Ti Kajen Yajasma Entsaya Yajasma ni kakarmarincha tura ni akupkatniuríncha susamai nujaj ti kakaram akupkati tusa. ³Entsaya Yajasma muuké chikichkin jakamnia awatmian wainkiamjai. Túrasha pénger awajnasmai. Túramtai ashí nunkanmaya shuar nuna físar ti enentáimturar nemarsarmai. ⁴Túrawar nin tikishmatrar shiir awajsar “¿Yaki jujajsha jeá. Imiá kakaram asamtai yaki nijijai máanaikminiait?” tiarmai. Tura Ti Kajen Yajasma ni kakarmarin Entsaya Yajasma susa asamtai ashí shuar nincha tikishmatrarmai.

⁵Núnisan nu Entsaya Yajasma waantu enentáimtumak Yúsan yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. ⁶Núnisan túrak Yúsan yajauch áujmatuk ni náarincha ni Jeecha tura ashí ni shuari nayaimpiniam pujuinia nunasha katsekkarmai. ⁷Tura Yusna ainia nujaj mesetan najana nupetkatniun tsankatnakmai. Tura ashí nunkanmaya shuaran akupkatniun tsankatnakmai. ⁸Túramtai ashí shuar tuke iwiaaku átinia nu papinium ni naari yámankamtaiknumia anujkamú atsúarma nuka nu Yajasma tikishmatrarmai. Nu papincha Murik jaka nantakmia nu takakuí.

⁹Shuar juna ántakka enentáimprati:

¹⁰“Shuaran emeté juinia nusha emetnattawai.

Núnisan shuaran nan_kijiai mainia nusha nan_kijiai mantamnattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin ániawai.

¹¹Nuyá chíkich Yajasma kukariá wáakun wainkiamjai. Nusha murikiu ánin jimiara kachurtiniuyi. Tura Ti Kajen Yajasma ánis kakaram chichaakuyi. ¹²Niisha Entsaya Yajasma kakarmarin súam akupniuyi. Tura ashí nunkanmaya shuaran “Entsaya Yajasma penké jaa tsuarma nu, shiir awajnasti” tími. ¹³Núnisan shuarti túrachminian ti turin asa ashí shuar ímiainain nayaimpinmaya jinia nunká ajuarmi. ¹⁴Tura Entsaya Yajasma súam aents túrachminian ti turak ashí nunkanmaya shuaran anankawarmai. Túrak Entsaya Yajasma nakumkamurin najanawarat tusa akupkamai. Túramtai puniajai penké jakamnia awatmia penker ajasma nuna nakumkamurin najanawarmai. ¹⁵Kukariá Yajasma kakaram sunasmai. Nujai Entsaya Yajasma najanamun iwiaaku awajsatniua ántsan ichachkiamai. Túram ashí níniak shiir awajeacham máatniun susamai. ¹⁶Nu arantcha ashí shuar anujmampararat tusa akupkamai. Uuntcha uchisha kufrinniusha kufrinchasha ankantcha ankantchasha ashí ni nijaiincha tura wakerakka untsuurincha anujtuktiniuyi. ¹⁷Entsaya Yajasma náarin tura wakerakka ni náari númerurin anujtuktiniuyi. Túrachuka sumatnasha sumakchamniuyi, surutnasha surukchamniuyi. ¹⁸Wats, wi tájana ju nekaatniuka ti nekas enentáimtustiniaiti: Entsaya Yajasma númeruri áishmanka númeruri asa sais sianu seséntisáisaiti (666). Ashí ti neka ania nú shuar Entsaya Yajasma númerurin nekapmar nin nekaati.

144.000 shuar Yúsán kantampruawarma

14 ¹Nuyá Murikiun Seun náinnium wajan wainkiamjai. Níjiaisha sianu kuaréntikuátru mir (144.000) shuar wajaarmai. Nusha nijai Murikiu náarincha tura ni Aparí náarincha anujtukma aarmai. ²Ti untsurí áran nayaimpiniam túntuiniak teer awajenak kanusa uuntri nujanrak téter ajá núnisan antukmajai. Ti kakaram ipiamta núnis amai. ³Nu tuntuiyamujai sianu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuaru tankunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu sianu kuaréntikuátru mir shuarka jú nunkanmaya shuarnumiá uwempraru ásar nu kántan kantamiarmai. ⁴Nu shuarsha nuwajai yajauch ajascharu ásar ti shiir ániawai. Túrawar Murik weana nu nemarainiawai. Ju nunkanmaya shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan armai. ⁵Nu shuar penké wáitruachu ásar Yúsajsha ti shiir tunáa máatrachu armai.

Menaintiu suntar chichaman etserainiawai

⁶Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nunkanam pujuinia nú shuaran

ujakartiniuyi. ⁷Nusha ti kakantar untsukum timiai: “Yus ashamkatarum. Niñki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunkancha nayaantsancha ashí entsancha najana asamtai shiir awajsatarum.”

⁸Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjaj nupetnak tuke emesnarai.”

⁹Nuyá chíkich suntar, menaintiua nu, taa timiai: “Shuar Entsayá Yajasmancha tura ni nakumkamuríncha shiir awajeakuínkia tura nijaiinimsha uwejnimsha ni naari anujtukmaitkuínkia ¹⁰Yus nin kajerak ti asutiáttawai. Yapá pachimprachman áartinia áintsan ti kajakattawai. Túramtai asupri ti tsúer keá nujaj jinium wáitsartatui. Yusa suntari tura Murik íimianum apenáwar jinium wáitsartatui. ¹¹Ni wáitsatniuri ji esaak kajintsuk tuke mukuintia nuniskete. Entsayá yajasman tura ni nakumkamurin shiir awajeenak ni naari anujmamainia nuka tsawajsha káshisha ayamtsuk wáitsartatui. ¹²Nu asamtai ni chichamen umirainiak Yusa ainia nuka Krístun ti shiir nemarainia ásar nu tsawantai itiurchatnum pujuiniak katsuntratin áiniawai.”

¹³Nuyá nayaimpinmayá chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

“Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiartatui” tawai” turutmiai.

Jú nunkanam arakma juukma

¹⁴Nuyá yuraním pújun wainkiamjai. Tura yuranminiam Aents Ajasua nuna eketun wainkiamjai. Akuptai tawaspan kurijjai najanamu etsenkrakuyi. Tura machitian éren takakuyi.

¹⁵Tura chíkich suntar Yusa Uunt Jeenia jiinki yuranminiam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.” ¹⁶Tutai yuranminiam eketu ni machitrijjai nunká arakman tsupir juukmai.

¹⁷Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. ¹⁸Tura chíkich suntar naman maar Yus-sútainmayá jíinkimiai. Niisha jinia wáinniuyi. Tura máchit ti éren takakun kakantar chicharuk timiai “Machitrum ti érea nujaj uwa nunká arakma nu tsupiram juuktá. Mash tsamakarai.” ¹⁹Tutai suntar ni machitrijjai ashí nunkanmayá uwa neren tsupir juukmai. Tura neketainiam chumpiamai. Nu neketai Yus ti kajerak shuaran ti asutiátt nuna nakumeawai. ²⁰Tura uunt péprunmayá arantach ijiurarmai. Tura neketainmayá numpa jíinkimiai. Nu numpa tres siantu (300) kirumitrua nu pajamar kawayu nujijai métek ajasmai.

**Nayaimpinmaya suntar amúamunam wáitkiastinia
nuna pininnumiān ukainiawai**

15 ¹Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

²Nuyá antumianka áiv 20 Tura uunt péprunmaya aranntsān ti saar jijiai pachimpramun wainkiamjai. Ni káanmatkarincha Entsayā Yajasman tura ni nakumkamurincha nupetkarma nu nui wajaarmai. Tura nin arpa tuntuitiain Yus súsarmai. ³Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme. ⁴Uuntá, ¿yaki ashampramkachatⁱ. Tura yaki ti shiir awajtamsachatⁱ? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

⁵Nuyá atak Yusa Uunt Jeēn ísan, Ti Shiir Tesaamun uranniun wainkiamjai. ⁶Tura Ti Shiir Tesaamunmaya siati suntar siati wáitkiastinjai jínkiarmai. Niisha ti shiir pújun entsaru armái. Netsepnumsha kurin emenmama armái. ⁷Nuyá kuaru tanġunmaya chikichik kurí pininġian súsarmai. Nu pininġ tuke iwiaaku Yusa kajetairijiai piaku armái. ⁸Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsain Yusa Jeēn wayachminiuyi.

Wáitkiastin pininġ ukararma

16 ¹Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati pininnum ana nu ashí ukartarum.”

²Tutai emka suntar we, pininnumiā kukar ukarmai. Túramtai ashí shuar Entsayā Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

³Nuyá chíkich suntar jimiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nui pujuinia nu kajinġkiarmai.

⁴Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai. ⁵Nuyá suntar entsá wáinniua nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíraitme. ⁶Iis, nu shuar amée shuárumincha

tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

⁷Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniau nu ti penker túrin asam nu shuar túramujai métek akiritme, timiai.”

⁸Nuyá suntar kuatrua nu, tsawai nantunam ukarmai. Túramtai jijiai shuáran esaamujai wáitkiastin kakaram sunasmai. ⁹Tura shuar ti sukuám wáitiarmia nu, nu wáitkiastinian nérenniun Yusan yajauch chicharkarmai. Tura ni tunaarín enentáimtsuk Nin shiir awajsatniuncha penké nakitrarmai.

¹⁰Nuyá suntar senkua nu, Entsaya Yajasma akupin pujutairín ukarmai. Túramtai ni nunkeen ashí kashi ajasmai. Tura shuar ti najaimiainiak iniaíncha esamiarmai. ¹¹Tura nújajisha yajauch túratniuncha iniaisacharmai. Antsu kuchapríjajisha tura ti najaimiainiak wáitiainiak nayaimpinmaya Yúsan ti yajauch chicharkarmai.

¹²Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnamai.

¹³Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsnan etserniua nuna weneyasha puachia núnin yajauch wakan menaint jiniarmai. ¹⁴Íwianch áiniak aents tujintiamun túruiniak ashí nunkanmaya akupniun irurarmai. Ti Tujincha-Yusaj ni uunt tsawantri jeamtai mesetan najanatai tusar weriarmai. ¹⁵(Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín penker wáinia nú shuar ti shiir átatui. Misuchu asa natsaarchattawai.” Tu tawai.)

¹⁶Tura yajauch wakan uunt akupin áinian Armajetún nunkanam irurarmai. Israer-chichamnum nu nunka tu anaikiamuiti.

¹⁷Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeniá ti kakaram chicham Yus akupin pujutainmaya chichaak “Mash uminkiai” timiai.

¹⁸Tura nuyanka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti. ¹⁹Ti Uunt Péprusha menaint nakantramai. Ashí nunkanmaya péprusha saanakiarmai. Nujsha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai. ²⁰Entsá ajapén atentrasha tura murasha menkaramai. ²¹Núnisan nayaimpinmaya uunt kaya núnisan micha kákeramai. Ti uunt áiniak kintiarjai métek kijin armái. Shuarsha nujai ti wáitiainiyatan áyatik Yúsan yajauch chicharkarmai.

Tsanirmatai nuwá asutiámu

17 ¹Nuyá siati suntarnumiá chikichik taruti turutmiai “Winitiaí. Tsanirmatai nuwá ti asutiátniun iniaktustatjame. Nu nuwá

nayaantsanam uku eketui. ²Ashí ju nunkanmaya akupin niijiai tsanirmawaru ániawai. Núnisan ashí ju nunkanmaya shuar, nu nuwa tsanirmatniun tsankateam, nijiamanch umartinia áintsar niijiai ti yajauch túrawar nampekarmai.” Nuna taku Yusnumia kanaktinian nakumkamai. ³Nuya mesekranam kampuntin atsamunam jurukmiai. Tura nuí Yajasma kapaakunam nuwa eketun wainkiamjai. Nu Yajasma manmasha ashí Yúsan yajauch chichareamu átramuyi. Muuke siátitiat kachuri tiásauyi. ⁴Nu nuwasha tarachin yamakai kapaakujai sha ti shiir iwiarmamar entsaruyi. Kurijai sha, shírmach kayajai sha, ti shiir sháukjai sha iwiarmampruyi. Kurí pininkian mujmiainniasha tura ashí ni tsanirmatairi imiá yajauch armia nunasha piakun ajaamak takakauyi. ⁵Nijia iniumsha ni naaria áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nunkanam Mujmiainian Túrinia Nunasha Nukurinti. ⁶Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukésha siátichukait tura kachurisha tiáschak áinia. ⁸Nu yajasma wáinkiam nuka yaunchu pujuwiti tura yamaikia juí pujachiat amúamunam tuke játsuk nánkatkachu wánmaya júinkíttiawai. Shuar nuna wáinkiar ni naari tuke iwiaaku pujutai papinium yámankamtaiknumia anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiat tawai’ turutmiai.

⁹‘Nekas neka ainia nu júna enentáimturarti: Siati muukenka siati náintian nakumui. Nu nuwa nuí eketui. ¹⁰Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chíkichka tuke taatsui. Nii taasha núkap tsawant akupkashtatui. ¹¹Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chíkich siati akupniujai iruram métek enentáimpramniai. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹²‘Tias kachuri wáinkiam nuka tias akupin tuke akupeenatsna núiti. Niisha nu yajasmajai métek penké ishichik tsawant akupin ajasartatui. ¹³Ju tias akupniusha métekrak enentáimiainiak ni kakarmarin yajasma sústartatui nújai sha akupkat tusar. ¹⁴Murikjai sha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Niijiai írutraa nu, Yus Winia atí tusa achikma ásar tura Nin tuke umirin ásar Niijiai nupetmakartatui.’

¹⁵Suntar tuke chichartak turutmiai ‘Tsanirmatai nuwa nayaantsanam uku eketu wáinkiachumek. Nu nayaantsaka ashí nunkanmaya shuáran

nakumeawai. ¹⁶Tura tias káchuka yajasmañum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui. ¹⁷Nu akupniu enentáin Yuska ni wakeramurín apujsaiti. Nii timia nu umintsáin akupniusha métekrak enentáimprar ni kakarmarín takamtsuk yajasmañ súsatniun enentáimtikramai. ¹⁸Nuwa wáinkiam nuka ashí nunkanmaya akupniun akupeana nu pépruiti.”

Papirúnia emesramuiti

18 ¹Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. ²Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairísha ajasai. Mujmiai nanamtincha tura ashí yajauch nanamtin ainia nusha nuí pasunmainiawai. ³Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar nijijai tsanirmawarua áinis ániawai. Tura shuarsha ni yajauch wararmajai ti kuítrintin ajasaruiti.” Tu timiai.

⁴Nuyá nayaimpinmaya ti kakantar chichaman antukmajai. “Wfi shuaraitrumna nuka nú peprunmaya jíinkitiarum. Túrachkurmeka ni tunaari jumamkirum ni wáitsatniuríncha pachiinkiatarme. ⁵Ni tunaarísha ti piak nayaimpiniam jeastatuk ajasai. Tuma asamtai Yus ni tunaarín kajinmatkichuiti. ⁶Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. ⁷Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjai. Wajechu asan penké wáitsashtiniaitjai” tu enentáimtumawai. ⁸Tuma asamtai ti wárik chikichik tsawantai ni wáitsatniuri tarittiawai. Jákatniusha ti wáitsatniusha tura tsukasha tarí ashí jijiai ekeemankattawai. Uunt Yus ashí Tujincha nu kajerkamú asa nujai asutniáttawai.” Tu timiai.

⁹Ashí nunkanmaya akupin nijijai tsanirmawaru ainia nu ashí yajauchin nijijai wararsaru ásar nu pepru esaak múkuint ajakui eararmai. ¹⁰Ti esaak wáitakui nuí pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniuri tarini.”

¹¹Núnisan ashí nunkanam súrín ainia nusha nu péprun ti kuntuts enentáimturar earartatui. Ni surutain itiamun ¿yaki sumarkat? ¹²Kame juna itiaru ániawai: kurincha, kuítniasha, kaya shíirmachincha, ti shiir sháuknasha, ti péñker tarachniasha, akupin entsatai shiirmachin yamakaincha kapañniuncha, sétancha, itiaru ániawai. Núnisan ashí

kuṅkuin numincha, ti shiir awara najanamuncha, ti shíiram numincha, yanḱú jiruncha, penḱé jiruncha, mármur kayancha itiaru áiniawai.

¹³Núnisan ishpiṅnasha, nusháa kuṅkuinniasha, mira kuṅkuinniasha, umutaincha, asuitincha, trikiu nerencha, tura trikiu ti péṅker nekenmancha itiaru áiniawai. Núnisan áintstai taṅkuncha, murikniasha, kawaincha ni kárurijiai, tura nú arantka shuárnasha suruktinian itiaru áiniawai.

¹⁴Tura nu péprun tiarmai “Numí neren ti wakeruk súmauya nu yamaikia nuṅ atsawai. Ashí ni kuítrisha tura ashí ni péṅkerisha tuke penḱé amuukayi.” Tu tiarmai.

¹⁵Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar earartatui. ¹⁶Túrawar tiartatui “Maa, uunt pépruitiat ti wáitnenmai ajakai. Nuwa ti penḱer iwiarmampra áinis nuyá shuar akuptai tarachin yamakaijiai kapaaku entsarmai. Kurijiaisha kaya ti shíirmachijiaisha tura ti penḱer sháukjaisha ti shiir iwiarmampraruyi. ¹⁷Ti wárik ashí ju kuit amukaiti.” Tu tiarmai.

Ashí uunt kanú kapitántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. ¹⁸Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹Tiar ti kuntuts pujuiniak awatmamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niijiai takasar kuítrintin ajasarmai. Tura ti wárik mash emesnarai.” Tu tiarmai.

²⁰Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsarmena nuna yapajtiurmakurme.

²¹Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke menḱakattawai. ²²Tura atakka jantsemma piṅkiuisha tampursha shakapsha antunkashtatui. Nu arantcha nuṅkia shuar penḱé takakmaschartatui. Túramtai nekeamusha antunkashtatui. Ashí mitia átatui. ²³Shiripkincha ekeemakchartatui. Nuatma nampersha antunkashtatui. Nuikkia ni shuari súrin arma nu ashí nuṅkanam naṅkaamantu armai. Tura ashí nuṅkanmaya shuaran waweatniua áintsan níiya núnis ajasarat tusa anaṅkawarmai. Túrasha núnisan ti kakarmaitiat ju mash túrunayi.” Tu timiai.

²⁴Kame ni akupkamujai péṅker shuar ti mantamnawaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péṅker shuar ashí nuṅkanam maamu ainia nuna numpesha nuṅ paant wáinkiamniaiti.

19 ¹Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nan̄kaamaku átinniasha, tura ashí kakarmancha nekas nérenniuiti. ²Niisha aya nekas péñker túratniua nuna túrin asa ti nukap tsanirmaun ashí shuaran tsanirjijai utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

³Ataksha kakantar unsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.”
Tu tiarmai.

⁴Tuíniakui paintikuatru uunta nu tura kuatru tan̄kusha nun̄ká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitíánitkiurmesha péechachitkiurmesha, ii Yusrj tuke shiir awajsatarum.” Tu timiai.

Murik nuatnaikiatin namperi

⁶Nuyá ti untsurí aents chichainiak kanusa uuntri nujan̄krak téter ajá núnisan̄ antukmajai. Ti kakaram ipiamta núnis amai.

“Tí shíiraiti, tiarmai. Ii Uuntri Yus ashí tujincha asa ashí akupkatniun nan̄kaamayi. ⁷Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. ⁸Murikiu anajmarmarin̄kia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar péñker túramun nakumeawai.

⁹Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Ju ka Yus timia asa imiá nekasaiti.”

¹⁰Takui nu suntaran shiir awajsataj tusan tikishmatramjai. Túramtai turutmiai “Peñke áinkiaip. Wisha Yusa yáintriñtjai ámijiai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹Nuyá nayaimp uranniun wainkiamjai. Nuji kaway puju wantinkiamai. Nu kawaynium ekeema nuna naari Ti Peñker Umin tutaiyi. Núnisan̄ Ti Nekas Turin tutaiyi. Ti peñker Akupin asa aya nekas péñker túrak mesetan najanaiti. ¹²⁻¹³Ni jiiisha jijiai métek keearmai. Múuknumsha akuptai tawaspan untsurí etsen̄krakuyi. Nuji ni naari Yus Chicham

áarmauyi. Túrasha tana nuna Niñki takamtsuk nekaamai. Numpajaj̄ enkerman entsaruyi. ¹⁴Ti untsurí̄ nayaimpinmayā suntar mesetnum weena áintsar kawainium ekemkar ti shiir pújun entsaru Nin nemariarmai. ¹⁵Nu suntara Uuntrī weneeya, ashí nunkanmayā yajauch shuuran máatin, puniá mai ere tsakatskatin jínmiyai. Tura jirujaj̄ asutiátniua áintsan̄ ti kakaram akupkattawai. Túrak Ashí Tujincha Yusa kajetairī ti kakarma nujaj̄ shuáran asutiáttawai. Uwa nekenkar̄ ijiuratniua áitkiasan̄ wáitkiasartatui. ¹⁶Ni pushirincha makuincha ni naarī áarmauyi: Ashí Akupniun Akupin tura Ashí Uunta Uuntrī.

¹⁷Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin̄ yurumáitiarum. ¹⁸Akupniu namañkés̄ha yuítiarum. Suntara kapitántrī namañkés̄ha, kakaram suntara namañkés̄ha, kaway namañkés̄ha tura eketainia nuna namañkés̄ha, kame ashí shuara namañkés̄ha nankaamantu ainia núnasha tura penké̄ shuar ainia núnasha yuítiarum.” Tu untsukmai.

¹⁹Tura nuyá Entsayā Yajasmacha tura jú̄ nunkanam akupin ainia nunasha ashí ni suntarjijaj̄ wainkiamjai. Niisha kawainium eketka nujaj̄ tura nuna suntarjijaj̄ mesetan najanatai tusar iruntrarmai. ²⁰Tura nu mesetnum Yajasmasha tura Kukariá̄ Yajasmasha, penké̄ ántar yúsnan etserniua nu, mai achinkiarmai. Nuikkia Entsayā Yajasma ni kakarmarin̄ súam nu Kukariá̄ Yajasmaka aents tujintiamun ti turak shuáran anañkawarmai. Túramtai nu shuar Entsayā Yajasma náarin̄ apujmamsar ni nakumkamurin̄ shiir awajsarmai. Tuma asamtai Entsayā Yajasmacha tura Kukariá̄ Yajasmacha íwiakuk asuprijaj̄ ti kea nu ji-antumiannum apeáwarmai. ²¹Chíkichka kawainium eketkanumiá̄ puniá tsakatskatin weneyā jijnmia nujaj̄ mantamnawarmai. Túramtai nanamtin ni ayashin̄ yuawar ejemakarmai.

Kristu mir uwí jú̄ nunkanam akupkattawai

20 ¹Nuyá nayaimpinmayā suntar táarun wainkiamjai. Nusha nánkatkachu waā yawirin̄ tura jin̄kiatai jirun kampurman takakuyi. ²Nu suntarsha Ti Kajen Yajasma jiru kampurmajaj̄ jin̄kiamai. Nu Yajasma iwianchi kapitántrī Satanas tutainti. Yáunchuyā-napiti niisha. Tura nu iwianchin̄ jin̄kiá̄ mir uwí pujusat tusa ³nánkatkachu waānam epen̄miyai. Tura waiti uraichminian anujtukmai. Mir uwí nankaamatsain̄ ashí nunkanmayā shuuran anañkawarain̄ tusa túramai. Antsu mir uwí nankaamasmatai ishichik tsawant an̄kant akupnaktiniaiti.

⁴⁻⁵Nuyá akupin pujutainium pujuinian wainkiamjai. Tura shuara túramurin̄ írsarat tusa kakaram sunasarmai. Tura núnisan̄ muukē tsupirka maamu wakanincha wainkiamjai. Nusha Yusa chichamen̄ etserainiak tura Kristu chichamencha etserin̄ ásar maamu armai. Niisha

Entsayá Yajasmancha ni nakumkamuríncha tikishmatracharu armai. Núnisan̄ náaríncha nijaiñiumsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nan̄kaamatsain̄ nantakcharmai. ⁶Antsu emka nantaktin tsawantnum pachiinkiarua nú shuar, ti penker áimak, ti shiir warasmin ániawai. Nu shuarka jimiara jákatniunam pachiintsuk Yusna tuke takarin tura núnisan̄ Krístunu tuke takarin ártatui. Tura Krístujai métek mir uwí akupkartatui.

⁷Tura mir uwí nan̄kaamasmatai uunt iwianch urani akupnaktatui. ⁸Túram ashí nun̄kanmayā shuáran anan̄kawartaj tusa jíinkittiwai. Kuk nun̄kanmasha tura Makuk nun̄kanmasha ashí pujuinia nuna anan̄kawartatui. Tura mesetan najanataj tusa ni suntarín nekapmarchamnia ti untsurí irurtatui. ⁹Tura ashí nun̄kan enetak Yushuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmayā jinia akuptuk mash áesawarmai. ¹⁰Tura iwianchi kapitíántri, nin anan̄kawarmia nu, asuprijiaī keá ji-antumiannum apenámai. Nu yaunchusha Entsayá Yajasmasha tura Kukariá Yajasmasha, penké ántar yusnan etserniua nu, nuí apenáwarmai. Nuísha tsawaiša káshisha iniannatsuk ti wáitsartatui.

Ashí amúamunam súmamtikiatin tsawant

¹¹Nuyá akupin pujutain úntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nun̄kasha nayaimpisha aya menkarar tuke atsúarmai. ¹²⁻¹³Tura túrunatsain̄ nayaantsanam jákarua nusha jíinkiarmai. Núnisan̄ iwiarsamunam jaka pujuinia nusha jíinkiarmai. Tura jákaruncha, nan̄kaamantu arma nunasha tura penké shuar arma nunasha, ashí wainkiamjai. Tura Yusaī naka wajaarmai. Nuyá ashí shuar túramu aakma papí urantrarmai. Tura nu papinium aarma nujaī métek ashí ni turamurí paant nékaneakui súmamtiknawarmai. Tura chíkich papisha tuke iwiaaku pujustin papí urankamai. ¹⁴Nuyá jákatin amuukati tusa ji-antumiannum apenámai. Nu ji-antumiannum wétin jimiara jákatin tútainti. ¹⁵Tura ashí shuar ni naarī tuke iwiaaku pujustin papinium atsúarma nusha nuí apenáwarmai.

Nayaim yamaram tura yamá nun̄ka

21 ¹Nuyá nayaimpisha tura nun̄kasha menkaramtai nayaim yamarman tura yamá nun̄kancha wainkiamjai. Tura nayaantsasha atsumai. ²Wi, Juan̄, ti shiir péprun, Yusnumiá yamaram Jerusaréñkan nayaimpinmayā táarun, wainkiamjai. Anajmarma ni áishrin̄ inkiuntaj tusa ti shiir iwiarmampra áintsan̄ ti penker iwiamuyi. ³Nayaimpinmayā ti kakantar chichaamun antukmajai. “Iisiá, Yus

yamaikia aentsjai pujawai. Tuke niijiai pujakui ashí ni shuari ártatui. Tura niijiai tuke pujak nekas tuke ni Yusri átatui. ⁴Yus ni neajkin ujurturartatui. Tura nuik amia nuka ashí amuukarmatai jákatniusha, úttincha, wáitsatniusha, tura najaimiatniusha atsuttawai.”

⁵Tura akupin pujutainium ekema nu “Iístá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.” ⁶Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kuítchajai áartatjai. ⁷Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui. ⁸Antsu sápijkia, Yúsán enentáimtichusha, yajauchin máatrasha, mankartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijiai keá ji-antumiannum apenáwartatui. Nuka jimiará jákatin tútainti.”

Yamaram Jerusaré

⁹Nuyá siati suntar pinin amúamunam wáitkiastinjai piakun takakua nuyá chikichik taruti túrutmiais “Winitiá. Murikiu anajmarmarin iniaktustatjame.” ¹⁰Taku mesekranam naint yakí juruki Yusnumiá ti shiir Jerusaren pepru nayaimpinmaya táarun iniaktursamai. ¹¹Nu péprusha Yusa wincharijiai tsáapniniuyi. Nu tsáapnincha kaya ti shífirmachia núnis jaspi kaya nuní saar asa ti tsáapniniuyi. ¹²Pepru yantamesha ti yakí pénkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi. ¹³Nantu tátainmaaní menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai. ¹⁴Ti uunt kaya tuse apujsamu armai. Tura nuí ekenir pénkramuyi. Nu tuse kayanam Murikiu akatramuri tuse armia nuna naari áarmauyi.

¹⁵Suntar wijiai chichaua nu, nekapmatain kurin takakuyi. Nujai pépruncha, wáitirincha, tura pénkramurincha nekapmartiniuyi. ¹⁶Pepru esantisha wan Kantisha yakirisha mash métekrak armai. Suntarsha péprun nekapmataijiai nekapmaram esantisha wan Kantisha tura núnisan jeamkamu yakirisha jimiará mir jimiará siantu (2.200) kirúmitru amai. ¹⁷Nuyá pénkriincha nekapmarmai. Suntar aents nekapmataijiai nekapmaram sesentikuatru (64) mitru amai. ¹⁸Nu pénkramusha jaspi kayajai najanamuyi. Péprusha aya kúrikiyi. Nu kuri ti penker sáarauyi. ¹⁹Pen apujtukma kayasha ti shiir kaya ainia nujai najanamu asa ti shiir iwiamuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuarua nusha ismirártauyi.

²⁰Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apujsamu asamtai ti shíirmachiíyi. ²¹Pepru wáitirí tuse ainia nu, ti shiir nayaantsanmaya shaukjaí chikichik najanamu armai. Pepru jintísha aya kúrikííyi. Nu kuri ti penker sáarauyi.

²²Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi. ²³Nu péprunmasha tsawai-nantusha kashí-nantusha atsumchamai. Antsu Yusa wincharí tsáapin awajmiai. Núnisan Muriksha tsáapin awajmiai. ²⁴Nu tsáapnijjaísha ashí nunkanmaya shuar wekasartatui. Tura ashí nunkanam akupin ainia nusha nuí yujainiak ni péñkerijjaí nuna shiir awajtuiniawai. ²⁵Tura kashi atsá asamtai tuke tsawaiti. Tuma asamtai wáitirí tuke epenchamu ártatui. ²⁶Tura ashí nunkanam péñker ana nuna nuí itiaartatui. ²⁷Tura yajauchikia penké wayashatatuí. Muíjmiainian túrincha tura anañkartincha penké wayachartatuí. Antsu áyatik shuar tuke iwiaaku pujutai papinium naari aarma ainia nuke wayawartatuí. Nu papincha Murik takakui.

22 ¹Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi jiiinmiai. Nu pujutaisha Yusna tura Muriknauyi. ²Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésha ashí nunkanmaya shuar tsuámatainti. ³⁻⁴Ashí yajauchia nuka atsuttawai. Uunt akupin pujutai, Yúsnasha Murikniasha, nuí aa asamtai ni shuari ti paant wainiainiak tikishmatrartatuí. Tura nijjaíncha ni naari anujmamkartatuí. ⁵Tura káshisha atsuttawai. Nuí pujuinia nuka shiripkincha etsancha atsumchartatuí. Uunt Yúsak tuke tsáapin awajtiatui. Tura ni shuari tuke iniannatsuk akupkartatuí.

Jesukrístu tátinrí penké nuntumsai

⁶Nuyá suntar turutmiai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chichamen enentáimtikramia núnisan yamaikia ni suntarin akuptuk wárik túrunatta nuna ashí ni shuarin ujakuíti.”

⁷“Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

⁸Wi, Juan, juna mash íisan mash antukmajai. Tura mash íisan antukan nayaimpinmaya suntar iniaktursama nuna shiir awajsataj tusan tikishmatramjai. ⁹Túram turutmiai “Penke áinkiaip. Wisha Yusa

yáintrintjai ámiijai métek tura yatsumijai métek. Yúsnan etserin ásar tura ju papinium áarma nuna umirainiak Yusa yáintrí ániawai niisha. Yúsak shiir awajsatniuiti.”

¹⁰Nuyá ataksha turutmiai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai. ¹¹Nu jeatsainkia yajauch shuarka tuke yajauch túruki wetí. Núnisan muíjmiainian túraka tuke túruki wetí. Antsu péñkeran túraka péñkeran túruki wetí. Núnisan esetar enentáimniusha tuke esetar Yusjai wekasati.”

¹²Muriksha tawai “Eta, ti wárik winittijai. Túran ti shíirmachin ashí péñker túramujai métek súsatniua nuna takukin winittijai. ¹³Wiitjai. Yámankamtaiknumiá amúanmasha tuke pjuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴Ni pushirí péñker nijiamatniua núnisan péñker túrinia nú shuar shiir warasniiaiti. Nu shuar nu pepru wáitiríncha wayamniiaiti. Túrar tuke iwiaaku pujutai numinmaya yuamniiaiti. ¹⁵Tura antsu Yúsan enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aá matsatainiak penké wayachmin ániawai.

¹⁶“Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úuntrintjai. Wikia ti tsáapin yaa, yánkuamia áintsanketjai.” Tu tawai.

¹⁷Yusa Shiir Wakanisha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajai umartí.

¹⁸Ashí shuar ju papinium Yus-Chicham aarma nuna antukarun juna ujaajai: Shuar juí áarman chikichan pataakka Yus nin ti wáitsatin juí aarma nuna patattsattawai. ¹⁹Núnisan shuar juí aarman emeneakuinkia Yus ni naarin iwiaaku pujutai papiniumiá japirattawai. Tura ti shiir péprunam wayatniun suritkiattawai. Nu péprusha tura nu papisha juí paant ujakma ániawai.

²⁰Jú papí áantratniun ujakua nu tawai “Eta, ti wari winittijai.”

Pai, núnisan atí. Wari winitia, Uunt Jesúsá.

²¹Ii Uuntri Jesukrístu atumniasha shiir yainmakarti. Nuke atí.